

engele om ons

Belinda Bras-Nel het die gawe om engele te kan sien en engelboodskappe te ontvang. Dit het haar uit die donker na 'n lewe van lig en oorvloed gelei, het sy vir Mariette Snyman vertel

SY PRAAT engeletaal

Belinda Bras-Nel het nie regtig 'n stralekrans nie. Die ligglans op die foto is die fotograaf se werk. Maar haar glimlag is warm, en sy straal van verwondering as sy vertel van die ongewone wêreld waarin sy leef.

Belinda kan engele sien en boodskappe van hulle ontvang. En asof dit nie genoeg is nie, sien sy feetjies - "natuurengele" - en eenhorings of *unicorns*. Sy kan telepaties met diere kommunikeer en verstaan bome en kristalle se taal. Soms, wanneer dit al manier is om iemand vrede te gee, maak sy kontak met mense aan "die ander kant". Die grootsheid van die onsiglike vou vrygewig voor haar oop.

Ongelooflik soos dit alles mag klink, bly Belinda (32) 'n plat-op-die-aarde ma van twee. Sy voer allermens 'n sprokiesbestaan en het 'n lang pad met depressie gestap. Dit het begin toe sy elektroniese ingenieurswese aan die destydse PU vir CHO gestudeer het. "Ek wou eintlik 'n B.A.-graad loop en 'n skrywer word, maar ek moes met 'n beurs studeer. Die ingenieurswese was 'n aanloklike opsie. Ná my eerste jaar het ek geweet dis nie my rigting nie, maar gevoel ek moes klaarmaak wat ek begin het."

Akademies het sy goed presteer, maar in haar derde jaar het gesondheidsprobleme kop uitgesteek. "Ek het depressie ontwikkel, angsaanvalle gekry en wou deurentyd slaap. Ek het

selfmoordgedagtes gehad en kalmeerpille begin bymekaarmaak. Die vriendin met wie ek 'n woonstel gedeel het, kon dit nie verduur nie en het elders heen getrek. My ma was so bekommerd dat sy my verloofde, Joop, gevra het om by my in die woonstel te kom woon. As jy in aanmerking neem dat ek uit 'n behoudende Afrikaanse gesin kom, kan jy dink hoe radeloos sy moes gewees het."

In haar finale jaar is Belinda met Joop getroud. Hy het pas as elektroniese ingenieur begin werk en hulle het na Vanderbijlpark, waar hulle nou nog woon, getrek. "Dit het regtig sleg gegaan met my. Een Sondagmiddag het ons by my ouers geëet, en my ma het na my gekyk asof sy my nooit weer sou sien nie. Net daar het Joop halt geroep. Al was dit kort voor my eind eksamen, het hy gesê ek moes my studie staak. Dit was 'n reuseverligting - maar toe sit ons met my studieskuld. Deur die genade het die firma by wie ek sou gaan werk, dié skuld afgeskryf."

Die volgende agt jaar was Belinda by die huis. "Ek het totaal nutteloos gevoel. Ek kon nie 'n graad agter my naam skryf nie en het nie my eie inkomste óf 'n ryding gehad nie. Dit was beslis nie die lewe wat ek my voorgestel het nie. As ingenieurstudent met 'n ruim beurs was die vooruitsigte so rooskleurig."

Belinda het keramiekverf begin doen en probeer om 'n besigheid op die been te kry,

maar vergeefs. Ná hul kinders, Julike (4) en Luc (2), gebore is, het sy kinderboekies begin skryf - sonder sukses. "In 2003 was ek op 'n alleraagtepunt. Ek kon nie myself óf ander help nie. Ek het ophou Bybel lees en bid. Ek was dolleeg, en kwáád vir God. Ek was bereid om my gesin en familie agter te laat. Ek het vir God gesê as Hy my nie iets gee om mee te werk nie, wil ek nie aangaan nie."

Engelstemme

Toe gebeur die eienaardige. In Desember daardie jaar het Belinda en die kinders skarlakenkoors gekry. "Ons hele gesin het een nag saam op die bed gelê. In my koorstoestand was ek van engele by ons koppe bewus. Elkeen se naam is in my kop uitgespel."

Omdat Belinda gedurig bang was dat Joop of die kinders iets sou oorkom as hulle iewers heen ry, het sy begin vra dat hul beskermengele hulle veilig moes terugbring.

"Ek het ook stemme in my kop gehoor wat nie myne was nie. Iets het vir my gesê dis engele, maar my verstand het gesê ek is besig om mal te word. Toe ek die kinders op 'n dag gaan haal, het ek weer sit en wonder of ek van my verstand af gaan. Ek het die radio aangeskakel en *Must be Talking to an Angel* het gespeel. Van toe af kon ek maar weet: sodra ek begin twyfel, speel 'n liedjie met die woord *angel* oor die radio. Dié soort sinchronisiteit bly



onverklaarbaar.”

Belinda sou dae lank aan iemand dink en dan die naam van 'n engel en 'n boodskap vir hom of haar kry. Wonderlik soos dit was, het sy nie geweet of mense haar sou glo nie. “Probeer 'n slag vir iemand vertel jy het 'n boodskap van sy beskermengel! My nabymense hét my geglo. My man het geen oomblik getwyfel nie en my ouers en sommige vriendinne het die wonder daarvan raakgesien.”

Hoe Belinda engele beleef

- Engele is God se boodskappers - sy hande en stem.
- Engele is nie mense wat doodgegaan het nie, maar andersoortige wesens.
- Engele is nie manlik of vroulik nie; hulle beeld wel “manlike” of “vroulike” aspekte uit soos die omstandighede vereis.
- Aartsengele se energie is kragtiger as beskermengele s'n. Feetjies is in werklikheid natuurengele. Diere het ook beskermengele.
- Jou beskermengel is van geboorte af by jou. Belinda glo jou engel ontwikkel saam met jou. Kinders se engele is dikwels so aktief dat sy skaars kan byhou wanneer sy 'n boodskap moet neerskryf.
- Engele benader mense altyd met onselfsugtige liefde.
- Engele help mense net op versoek. Die enigste uitsondering is 'n situasie waar iemand gevaar loop om voortydig te sterf.
- Jy kan engele enigiets vra. Niks is te groot of te netig nie.
- Engele gee net gehoor aan versoeke wat met suiwer bedoelings gevra word en met God se wil ooreenstem.
- Engele gee selde reguit antwoorde, eerder leiding wat jou help om jou eie antwoorde te kry.
- Engele kan op verskillende plekke gelyk wees, omdat hulle in 'n ander tydruimtelike dimensie bestaan.
- Vir mense wat engele kan sien, lyk hulle nie noodwendig dieselfde nie. Party mense sien 'n kleur of 'n ligbal. Party sien groot engele, ander kleineres. Belinda glo jy sien waarmee jy gemaklik is en dat jy geen spesifieke verwagtings moet hê nie.

engele om ons

Maak kontak met jou engel

Engele wys hulle op verskillende maniere aan mense, sê Belinda.

"Hulle kan jou leiding gee deur 'n liedjie se woorde, iets wat jy op TV sien, of iets wat jy lees. Hoe meer jy jou vir sulke sinchronisiteite of sinvolle 'toevallighede' oopstel, hoe meer ervaar jy."

As jy wil weet wat jou beskermengel se naam is, kan jy net stil raak en vra. Die naam sal by jou opkom.

Party mense gebruik engelkaarte (*angel cards*) om leiding te kry.

As Belinda vir jou 'n engelboodskap afneem, raak sy vooraf stil om haar op jou beskermengel en jou behoeftes in te stel. Sy kry die engel se naam en die boodskap in die vorm van gedagtes en skryf dit so vinnig moontlik neer, in die woorde wat eerste by haar opkom. Dit kan in Engels, Afrikaans of albei wees. Terwyl sy die boodskap neerskryf, moet jy jou met iets anders besig hou. Agterna kan jy vrae vra.

Die boodskappe kan algemeen wees, of op die man af. Soms ontbloom dit die emosionele probleem wat agter 'n fisieke kwaal lê. Daar is altyd iets positiefs in 'n boodskap. "Sodra ek die boodskap vir iemand gegee het, vergeet ek daarvan. Ek vertrou God om die mens verder te versorg."

Boomterapie

Belinda was van kleins af sensitief vir bome en diere se energie. "Ek kon dit nooit hanteer om 'n boom te sien wat afgekap is nie. Nou nog voel dit of my siel uitgeruk word. Ek voel die hartseer van die ander bome oor die verlore boom. Ek sal God nooit in die oë kan kyk as ek 'n boom afgekap het nie.

"Ons moet verstaan dat bome die basis vorm vir die energieverbindings tussen die aarde en die hemel. As ek met 'n boom kommunikeer, voel ek die wysheid van die eeue aan. Hulle is die oudste siele wat ek nog in fisieke vorm teëgekomp het en hulle is almal aan mekaar verbind. Hulle kan ook ons negatiewe gedagtes en energie op hulle neem. As ek moeg of gedreineer voel, hoef ek net my arms om 'n boom te slaan. "Om meer positiewe energie op die aarde te hê, moet ons eenvoudig leer om respek vir die natuur, en veral vir bome te hê."

Maar almal het nie positief gereageer nie. Belinda het vriendinne verloor. "Ek het gou geleer ek kon nie elke boodskap sonder meer oordra nie."

Sy het versigtiger geword. 'n Universiteitsvriendin wat van haar weggedryf het toe sy aan depressie gely het, het vroeg in 2004 met haar kontak gemaak. "Sy wou gaan koffie drink. Ek kon nie verstaan hoekom sy my ná al die jare opsoek nie. Toe kry ek vir haar 'n boodskap: Sy sou 'n baba hê en alles sou goed gaan. Ek het geweet sy en haar man is albei beroepsgerig, en ek het aangeneem dat hulle nog nie gereed was om kinders te hê nie. Die boodskap was vir my vreemd. Ek het besluit om die papier saam te vat waarop ek die boodskap neergeskryf het, maar niks te sê nie."

Terwyl hulle kuier, het die vriendin vir Belinda vertel dat sy alles probeer het om swanger te raak, maar verniet. Nie operasies of kunsmatige bevrugting het gehelp nie. "Sy het vertel hoe sy dag na dag gevra het God moet vir haar 'n teken gee, en dat sy daardie oggend besluit het dis die einde van die pad. Sy wou finaal weet of sy moes voortgaan of tou opgooi. Ek het die boodskap uitgehaal en vir haar gegee."

Die vriendin was verwonderd, maar onseker of sy dit kon glo. "Gaandeweg het sy positiewer geword. Sy het my gebel en gevra of sy weer kunsmatige bevrugting moes kry. Ek het die boodskap gekry dat net geloof nodig was."

Die vriendin het besluit om tog die bevrugting te laat doen, maar was die betrokke dag te besig by die werk. "Kort daarna was sy swanger. Ek is dankbaar om só 'n instrument te kan wees."

Aanvanklik kon Belinda nie die engele sien nie. Sy het net 'n wete gekry dat 'n engel naby is en dat sy hand byvoorbeeld op die mens met wie sy besig is, se skouer rus. "Eendag het ek sit en peins oor hoe lewendig my verbeelding is, en my engel oorkant my sien sit. Toe vertel my engel my dat dit verkeerd is om te dink iets is 'net jou verbeelding'. Jou verbeeldingskrag is juis die instrument wat jou kan help sien - mits jy dit vertrou."

Belinda sien nie deurentyd engele nie. Dis te oorweldigend, en boonop ontmoet sy 'n ander engel saam met elke nuwe mens wat sy leer ken. "Ek moet my instel om engele te kan sien. Ek moet ook weer 'afskakel' om balans in my lewe te kry. Ek word gereeld teruggebring aarde toe deurdat die huis skoongemaak en die kos gekook moet word!"

Mettertyd het Belinda waterverfketse van engele begin maak en energiegenesing begin doen. Op haar ouers se hoewe, reg langs hulle, het sy 'n versameling wilde katte. "Ek voer hulle, maar jy kan nie aan almal raak nie. Hulle is te wild."

Op 'n dag het een van die katte teruggekom met 'n diep wond aan sy sy. "Ek het die leiding gekry om my hande op hom te sit terwyl hy eet. Tot my verbasing het hy stil gestaan. Ek het gevoel hoe God se energie deur my na hom vloei. Ek het dit elke dag gedoen, en binne drie weke was die wond gesond. Sedertdien kom skuur die kat teen my bene as ek hulle gaan kos gee."

Teen vergoeding?

Eers het Belinda nie geld gevra om engelboodskappe vir mense af te neem nie. "Ek het gevoel ek kan mos nie geld aan iets spiritueels koppel nie!" Tog kon sy nie verstaan hoekom haar krag getap was ná so 'n sessie nie. "Ek het min geduld gehad met die kinders, en was te lam om die huishouding te behartig."

Belinda se predikant het 'n antwoord gehad. "Hy het gesê dit gaan om die uitruil van energie. Ek gebruik energie om die boodskappe af te neem, en in ruil daarvoor moet ek 'n ander vorm van energie kry - soos geld. Hy het my ook daaraan herinner dat ek God gevra het vir iets waarmee ek mense kan help én 'n inkomste kan verdien!"

As sy terugkyk, besef sy hoe dramaties haar lewe in 'n kort tydjie verander het, sê Belinda. "In alles sien ek God se hand. Hy het my na die Labirint holistiese sentrum in Vanderbijlpark gelei waar ek konsultasies doen. Daar het ek meer van kristalle en hul helende eienskappe geleer. Ek, wat vroeër so skaam en teruggetrokke was, hou nou werkwinkels. God gee jou voorwaar meer as wat jy ooit kan bid of dink."

Belinda Bras-Nel doen een-tot-een-telefoon- of e-pos-konsultasies (engelboodskappe en boodskappe van troeteldiere) en hou engel- en feetjiewerkwinkels. Meer inligting by 016 987 1894, 082 929 8938 of belinda.brasnel@telkomsa.net